

# Placi Deragisch O.C. (1875-1944)

Ils 16 d'avrel secumplenescha gest il miez tschentaner, ch'il missiunari romontsch, pader Placi Deragisch ei morts. Ina generaziun pli veglia seregorda aunc bein d'haver viu el sin scantschala e queta podà aunc dad udir quella vusch sonora e marcanta. Siu viadi terrester ei ius en in ault stendiu artg, sut sacrificis e lavur pil salit da biars, haven da Sedrun/Bugnei entochen alla fossa el santeri claustral a Wil SG. Per quest anniversari, en pietad, in pèr plaids en memoria, in pèr flurs sin sia fossa.

## El mund

Sut il datum dils 11 d'avrel 1875 haveva il plevon da Tujetsch, sur Maurus Desax (+1881), nudau la naschientsha da Giuseppe Antoni Deragisch e battegiau el sin quei num: Il futur pader Placi, caputschin. Igl adolescent Sep Antoni sedistingueva aparti en talent ed iniziativa. Ils



apostols eran pescadurs. Il Sep Antoni catschadur. En giuvens onns, secape-scha, era el in versau e passiunau ca-

tschadur. Ins ha lu era viu el en survetsch dalla patria, cun buis e capellina, sco schulda, appuntau e lu aunc sco uerbel sergeant (Wachtmeister).

La divina providentscha muossa savens la via entras segns. Entras ina mal-precauta manipulazion cun la buis da catscha ha Sep Antoni piars in egl, il seniester. El dumbrava lu mo 25 onns. Aunc quei onn ha el pendiu la buis da catscha vid la preit. Cuort decidius ha el aviert ils cudsichs da scola. E cun da quels onns eis el semess en retscha cun students in bienton pli giuvens e da bia levseenn. Al gimnasi da Mustér ed a Nossadunnaun ha el acquistau las armas scientificas per la matura.

## En claustra

Ei era il settember 1904 ella claustra dils caputschins sil Wesemlin a Lucerna. Sep Antoni Deragisch bratta l'uniforma d'officier cul habit dil «poverello» d'Assisi, da sogn Francestg. Il giuven cavalier, Francesco Bernardoni d'Assisi veva gie mess, da liber maun,

sia orgiamenta tarlischonta d'ina vart, per sevestgir cullas lumpas da rugadur. — Sep Antoni fa il noviziat e daventa, sut il num dil patrun dalla Cadi, sco pader Placi, in ver caputschin. La stad 1910 vegn el ordinatus sacerdot. Sia messa nuviala celebrescha el ella baselgia claustral da Soloturn.

Sin la fiasta da legria suonda il luverdi da lavur e strapaz. Pader Placi, domicilius successivamein en las differentas claustras svizras digl uorden, vegn engaschaus dapertut, nua ch'ei fa basegns. El ascenda scantschala per dis da fiesta, fa missiuns per romontsch e per tudestg e savens exercezis, ei il preferiu confessur ed il refugi da biars contrastai e malsauns. D'in temps gidava el ora dumengia per dumengia els pli allontanai loghens dil Valleis. E tgi en tiara romontschha ha, da siu temps, buca udiu ses excellents clars, populars e pratics priedis da missiun e da fiasta? Da natira ferms e robusts, ha el saviu luvrar entochen cuort avon la mort.

## Davos viadi

La forza per tonta lavur anflava pader Placi ella oraziun. Clamava il zennet dalla claustra la damaun allas tschun ils confrars alla oraziun, haveva pader Placi gia urau il rusari en sia cella. El s'avischinava als 70 onns da sia veta ch'el ha stuiu ir en spital per ina operaziun. L'ura da lavur era secumplenida. Sco fideivel fegl da sogn Francestg ha el renovau ses vuts digl uorden ed engraziau al donatur da tutt beins. Assistius da siu frar, pader Teodosi, ha el priu cumiau da quest mund e surdau sia olma als mauns dil Scaffider. Ei era Dumengia alva endamaun.

sur Felici Maissen